



14.08. 2024թ.

## Կարծիք

### Վարդան Բաղասյանն ընդդեմ Նարեկ Մանթաշյանի և լրատվամիջոցների վերաբերյալ

#### Փաստերը

2020 թվականի հուլիսի 10-ին քաղաքացի Վարդան Բաղասյանը հայցադիմում է ներկայացրել Երևանի ընդհանուր իրավասության դատարան ընդդեմ Նարեկ Մանթաշյանի, «Նյուզ Էյ Էմ» ՍՊԸ-ի, «Դատաբլոգ» ՍՊԸ-ի, «Անալիտիկ» ՍՊԸ-ի, «Ալտերնատիվ.ԷյԷմ»-ի և «Այպրես.ԷյԷմ»-ի՝ զրպարտություն պարունակող տվյալները հրապարակայնորեն հերքելու, լրատվության միջոցներով հերքում հրապարակելու և պատվին, արժանապատվությանը և գործարար համբավին պատճառված վնասը փոխհատուցելու պահանջներով (տե՛ս թիվ [ԵԴ/20756/02/20](#) դատական գործը և դրանից առանձնացված թիվ [ԵԴ/4169/02/23](#) դատական գործը): Հայցվորը ներկայացրել է, որ 2020 թվականի հունիսի 9-ին բլոգերներ Նարեկ Մանթաշյանը և Կորյուն Գրիգորյանը ռեստորանում մոտեցել են այն ժամանակվա ՀՀ արդարադատության նախարար Ռուստամ Բաղասյանին և իշխող «Քաղաքացիական պայմանագիր» կուսակցության վարչության անդամ Տիգրան Ավինյանին և խոսակցության բռնվել նրանց հետ, որի վերջում Նարեկ Մանթաշյանը հնչեցրել է Ռուստամ Բաղասյանի հոր՝ հայցվոր Վարդան Բաղասյանի վերաբերյալ հետևյալ արտահայտությունը՝ *«Հայրիկին էլ կբարենք՝ որպես նախկին կոռուպցիոներ»*: Միջադեպը ուղիղ եթերով հեռարձակվել է Կորյուն Գրիգորյանի ֆեյսբուքյան էջում, իսկ ավելի ուշ արդեն իր էջով տեսագրությունը տարածել է նաև պատասխանող Նարեկ Մանթաշյանը: Այնուհետև տեսանյութը [վերահրապարակել](#) են մի շարք լրատվամիջոցներ, այդ թվում սույն գործով պատասխանողները՝ վկայակոչելով հրապարակման աղբյուրը: Վարդան Բաղասյանն իր հայցում պնդել է, որ Նարեկ Մանթաշյանի *«Հայրիկին էլ կբարենք՝ որպես նախկին կոռուպցիոներ»* արտահայտությունը զրպարտող է:

2024 թվականի մարտի 18-ին դատարանը կայացրել է վճիռ, որով հայցն ընդդեմ Նարեկ Մանթաշյանի բավարարել է, իսկ լրատվամիջոցների մասով՝ մերժել է: Ինչ վերաբերում է փոխհատուցմանը, ապա ներկայացրած 2 մլն դրամի պահանջը վճռով

նվազեցվել է մինչև 300 հազար դրամ, իսկ փաստաբանի վարձատրության գումարը բավարարվել է 50 հազար դրամի չափով: Դատարանը նաև պարտավորեցրել է Նարեկ Մանթաշյանին «Նյուզ Էյ Էմ» ՍՊԸ-ի, «Դատաբլոգ» ՍՊԸ-ի, «Անալիտիկ» ՍՊԸ-ի, «Ալտերնատիվ.ԷյԷմ»-ի և «Այպրես.ԷյԷմ»-ի լրատվության միջոցներով, ինչպես նաև «Ֆեյսբուք» սոցիալական ցանցի Նարեկ Մանթաշյան օգտանունով էջում հրապարակել հերքում հետևյալ տեքստով. *«Ես՝ Նարեկ Մանթաշյանս, հերքում եմ 2020 թվականի հունիսի 9-ին իմ կողմից հրապարակայնորեն հնչեցված և զրպարտչական բնույթի տարրեր պարունակող՝ Վարդան Բաղասյանի՝ նախկինում կոռուպցիոներ լինելու վերաբերյալ հայտարարությունը: Իմ տիրապետության տակ չեն եղել և չկան փաստեր, որոնք կհիմնավորեն Վարդան Բաղասյանի՝ նախկինում կոռուպցիոներ լինելու հանգամանքը»:*

Վարդան Բաղասյանը վճռի դեմ բողոք է ներկայացրել Վերաքննիչ քաղաքացիական դատարան: Այն ընդունվել է վարույթ, սակայն դատական քննության օր դեռ չի նշանակվել: Պատասխանողները վճիռը չեն բողոքարկել:

## Եզրահանգում

ՀՀ վճռաբեկ դատարանի իրավական դիրքորոշման համաձայն՝ որպեսզի հայտարարությունը Քաղաքացիական օրենսգրքի 1087.1 հոդվածի իմաստով համարվի հրապարակային, բավարար է, եթե այն հնչեցվում է առնվազն մեկ այլ անձի ներկայությամբ կամ նրան հաղորդակից դարձնելով: Տվյալ դեպքում հայտարարությունն արվել է երեք անձի ներկայությամբ: Այնուհետև Նարեկ Մանթաշյանը «Ֆեյսբուք» սոցիալական ցանցի իր էջում հրապարակել է այդ երկխոսության տեսանյութը, ինչը նույնպես կարող է համարվել զրպարտող բնույթի հրապարակային հայտարարության ինքնուրույն դրվագ:

Խորհուրդը համամիտ է դատարանի հետ, որ վիճահարույց արտահայտությունը զրպարտող է, քանի որ, ելնելով հասարակական պատկերացումներից ու ձևավորված ավանդույթներից, այն իր էությամբ անձի պատիվը և արժանապատվությունը արատավորող է: Ինչ վերաբերում է նրան, թե արդյոք նման հայտարարությունը կարելի է որակել որպես գնահատող դատողություն, ապա անհրաժեշտ է ուշադրություն դարձնել, նախ, որ պատասխանողները չեն ներկայացրել այդպիսի փաստարկ, իսկ Նարեկ Մանթաշյանն էլ դատարանում չի բերել որևէ հիմնավորում, որ խնդրո առարկա հայտարարությունն անելու համար նա ունեցել է որոշակի փաստական հիմքեր: Այս առումով Վճռաբեկ դատարանն իր նախադեպային որոշումներից մեկում նշել է, որ *«Եվրոպական դատարանի իրավական դիրքորոշումներով պաշտպանվում է բացասական կարծիքի կամ գնահատող դատողության արտահայտումն այնքանով, որքանով այն հիմնված է հաստատված կամ ընդունված փաստերի վրա: Ի տարբերություն փաստերի, որոնք կարող են ներկայացվել և հիմնավորվել, գնահատող դատողությունները չեն կարող ապացուցվել ... գնահատողական դատողությունը կարող է անընդունելի համարվել, քանի որ այն առանց փաստական հիմքի կարող է չափազանցված*

համարվել» (Վճռաբեկ դատարանի 21/07/2020թ. որոշումը ԵԴ/7480/02/18 քաղաքացիական գործով, էջ 8):

Հաշվի առնելով վերը նշվածը՝ Խորհուրդը գտնում է, որ տվյալ դեպքում առանց որևէ փաստական հիմքի հնչեցված արատավորող բնույթի հրապարակային հայտարարությունը չի կարող համարվել գնահատող դատողություն ու պաշտպանվել ազատ խոսքի իրավունքով: Բացի այդ, Նարեկ Մանթաշյանի կողմից վիճահարույց արտահայտության օգտագործումը **պայմանավորված չէր որևէ հանրային շահով**: Հետևաբար, պատասխանողի՝ «Հայրիկին էլ կբարևեք՝ որպես նախկին կոռուպցիոներ» հայտարարությունը զրպարտող բնույթ ունի:

Խորհուրդը ողջունելի է համարում այն, որ դատարանը խախտումը ճանաչել է պատասխանողներից միայն Նարեկ Մանթաշյանի մասով, իսկ լրատվամիջոցների մասով, որոնք վերահրապարակել են նրա տարածած տեսանյութը, խախտում չի ճանաչել: Ըստ դատարանի՝ տվյալ դեպքում լրատվամիջոցները գտնվել են 1087.1 հոդվածի 9-րդ հոդվածի պաշտպանության տակ, քանի որ գործել են բարեխիղճ և նյութը վերահրապարակելիս նշել են տեղեկատվության աղբյուրը:

Սրա հետ մեկտեղ Խորհուրդն իր անհամաձայնությունն է հայտնում դատավճռի այն մասի հետ, որով Նարեկ Մանթաշյանին պարտավորեցվում է սահմանված հերքումը, բացի իր ֆեյսբուքյան օգտահաշվից, հրապարակել նաև այն լրատվամիջոցներում, որոնք վիճարկվող նյութը վերահրապարակել էին իրենց էջերում: Այդպիսի պարտադրանքը հատկապես անընդունելի է, եթե հաշվի առնենք, որ հայցն ընդդեմ այդ լրատվամիջոցների դատարանը մերժել է, և Նարեկ Մանթաշյանի հնարավորություններից դուրս է խմբագրություններին ստիպել, որ նրանք հերքում հրապարակեն: Առավելագույնը, որ այս դեպքում դատարանը կարող էր անել, դա պատասխանողից պահանջելն էր, որ նա դիմի վերոհիշյալ լրատվամիջոցներին՝ հերքման տեքստն իրենց մոտ տեղադրելու համար: Իսկ ընդառաջել այդ դիմումին և հրապարակել հերքումը, թե՛ ոչ, դա արդեն խմբագրությունների որոշելիքը պետք է լիներ: Դատական գործով կողմ չհանդիսացող լրատվամիջոցների համար օրենքն այլ բան չի նախատեսում:

## Տեղեկատվական վեճերի խորհուրդ

**Շուշան Դոյդոյան** (Խորհրդի քարտուղար) - Ինֆորմացիայի ազատության կենտրոնի նախագահ  
**Արա Ղազարյան** - «Արա Ղազարյան» իրավաբանական գրասենյակի տնօրեն  
**Բորիս Նավասարդյան** - Երևանի մամուլի ակումբի պատվավոր նախագահ  
**Արամ Աբրահամյան** - «Առավոտ» օրաթերթի գլխավոր խմբագիր

**Աշոտ Մելիքյան** - Խոսքի ազատության պաշտպանության կոմիտեի նախագահ

**Օլգա Սաֆարյան** - Փաստաբան